


洪文惠公年譜

田漢雲點校



洪文惠公年譜

宋徽宗政和七年丁酉公生。

公諱适，字景伯。初名造，字溫伯。亦字景溫。饒州鄱陽縣人。右通直郎、贈太師秦國

公彥先之孫，徽猷閣學士、贈太師、魏國忠宣公皓之長子也。高祖士良、曾祖炳贈少保。

忠宣公以政和五年登進士第。六年授台州寧海縣主簿。七年，建三瑞堂，以荷花、桃實、竹幹皆有連理之瑞，故名。其秋，公生于官廨。

重和元年戊戌，二歲。

宣和元年己亥，三歲。

二年庚子，四歲。

弟文安公遵生。忠宣公拜南京國子博士未上，賊犯杭州。經制使陳亨伯檄主餉，遷秀

州司錄。以本紀方臘陷杭州事推之，當在是年。

三年辛丑，五歲。

四年壬寅，六歲。

五年癸卯，七歲。

弟文敏公邁生。

六年甲辰，八歲。

七年乙巳，九歲。

欽宗靖康元年丙午，十歲。

高宗建炎元年丁未，十一歲。

二年戊申，十二歲。

忠宣公丁父太中憂，還鄉奔喪。母太碩人年七十，與諸孫在秀州。公幼穎，日誦書三千言。

三年己酉，十三歲。

忠宣公以徽猷閣待制、假禮部尚書、充金國通問使。以父喪母老懇辭，不許，遂行。寓家秀州。公年甫十三，能任家事，率五弟三妹奉祖母及母，避兵歸饒州。以忠宣公出使，恩補修職郎。

四年庚戌，十四歲。

紹興元年辛亥，十五歲。

二年壬子，十六歲。

王倫自金還，言忠宣公奉使不屈。詔下秀州，存問家屬。

三年癸丑，十七歲。

四年甲寅，十八歲。

五年乙卯，十九歲。

公未冠，以修職郎監南岳廟。咸淳臨安志：洪氏浴室院在富陽縣。建炎庚戌，洪忠宣公皓持節使

北，其長子文惠公适年十三，思奉甘旨。越六年，當紹興乙卯，遂建此院于富春，以寓拳拳之思。後七

十年，曾孫侃來丞富春，乃職其事。

六年丙辰，二十歲。

七年丁巳，二十一歲。

七月作戒蛇文。
長子槐生。初名格。
調嚴州錄事參軍。未詳年月，附見于此。

八年戊午，二十二歲。

十一月二十三日，母魏國太夫人沈氏薨。公復還秀州，食忠宣公之祿。

九年己未，二十三歲。

十一月辛丑，葬魏國于無錫縣開化鄉白茅山之原。

十年庚申，二十四歲。

十一年辛酉，二十五歲。

除浙西提舉、常平司幹辦公事。未詳年月，當在服闋之後。是夏，忠宣公自金遣邵武男子李微以皇太后書至。時河南復爲王土。公擬宰臣賀表，有云：「宣王復文武之土，光啓中興；齊人歸鄆，不失舊物。」仲舅博士沈松年一見奇之，勉以習宏詞科。乃與二弟閉門習，爲之夜不安枕者餘歲。作蟄寮記。

十二年壬戌，二十六歲。

公與弟文安公同試博學宏詞科。試題：代樞密使謝賜玉帶表、克敵弓銘、皇叔慶遠軍承宣使授昭化軍節度使封安定郡王同知大宗正事制、唐勤政務本樓記、周成王蒐岐陽頌、漢五家要說章句。序文安公第一，公亦中選，名在第三。宰相進呈所試制詞，高宗曰：「父在遠方，子能自立，此忠義報也。」擢文安公秘書省正字。中興以來詞科中選即入館，自文安始。除公左宣教郎、敕令所刪定官。

十三年癸亥，二十七歲。

以敕令所書成，拜秘書省正字。容齋四筆：紹興十三年，敕令所進書，刪定官五員皆自選人改秩。潘良能季成、游操存誠、沈介德和伯、兄景伯皆拜秘書省正字。張表臣正民以無出身，除司農丞。四正字同日赴館供職。少監秦伯陽于會食之次謂坐客，言一旦增四同舍，而姓皆從水旁。嬉有一句，願諸君爲對之，以成三館異日佳話。即云：「潘、游、洪、沈泛瀛洲」，坐客合詞嘆賞，竟無有能對者。

六月，忠宣公自金還，八月，至都，召對。除徽猷閣直學士、提舉萬壽觀兼權直學士院。

九月，出知饒州。公以奉親，自列添差通判台州軍事。

十四年甲子，二十八歲。

到台州任。是歲六月，忠宣公以中丞詹大方劾奏，罷饒州，提舉江州太平觀。尋丁內憂。公行縣至寧海，題三瑞堂詩云：「久矣馳魂夢，今登三瑞堂。故山有喬木，近事話甘棠。展驥慚充位，占熊憶問祥。白雲留不住，極目是吾鄉。」

十五年乙丑，二十九歲。

在台州任。是歲文敏公中博學宏詞科。

十六年丙寅，三十歲。

在台州任。爲張伯壽作萬養堂記。

十七年丁卯，三十一歲。

五月，忠宣公責濠州團練副使，英州安置。公通判台州將滿，與郡守曾惇不相能。十一月，殿中侍御史余堯弼論公「奸險強暴，得自家傳。在州貪墨逾濫」，遂免官。繫年錄稱「左奉議郎」。

十八年戊辰，三十二歲。

公既免官，往來嶺南侍親者凡九年。

十九年己巳，三十三歲。

二十年庚午，三十四歲。

二十一年辛未，三十五歲。

十二月一日舟泊虔州，有紀夢一篇。
作嘉濟廟碑、知政橋記。

二月二十二日，在英州作通天巖記。

二十二年壬申，三十六歲。

二十三年癸酉，三十七歲。

二十四年甲戌，三十八歲。

二十五年乙亥，三十九歲。

忠宣公謫九載，始復左朝奉郎，主管台州崇道觀，居袁州。未逾嶺，疾作。十月二十日，

薨于南雄。詔復敷文閣直學士。

二十六年丙子，四十歲。

十一月丙申，葬忠宣公。公撰忠宣公行狀，題銜稱左奉議郎主管台州崇道觀。

以迪功郎充江南東路轉運司準備差遣。

二十七年丁丑，四十一歲。

爲忠宣公製十六尊者像作偈。

二十八年戊寅，四十二歲。

服闋。四月，除知荆門軍。六月到任。九月應詔，上寬恤四事。

一十九年己卯，四十三歲。

在荆門任。其秋，以左朝奉郎借紫知徽州。九月十六日到任。

三十年庚辰，四十四歲。

在徽州任轉左朝請郎。范公至能名成大。爲州司戶參軍。公一見知其遠器，勉以吏事，暇日與商榷今古。謂范公曰：「君它日必登兩府。慎自愛。」范深德之。刻研說三種于郡齋。

三十一年辛巳，四十五歲。

二月二十九日，除提舉浙西常平茶鹽。甫到任，會文安公知平江府，以嫌改除提舉江東路常平茶鹽，兼提點刑獄，仍借紫。三月初四日到平江任。初六日改除江東提舉常平茶鹽公事。

三十二年壬午，四十六歲。

三月，車駕親征至建康，公上殿奏事。四月十九日，除尚書戶部郎中總領淮東軍馬錢糧。二十日，離池州。二十六日，到京口任。是月，文敏公以起居舍人假翰林學士充賀金登位使。六月，孝宗即位。七月，文敏公使還，爲言者劾罷。

孝宗隆興元年癸未，四十七歲。

在淮東總領任，符離用兵饋餉繁夥，公供億無闕，就遷司農少卿。五月，文安公同知樞密院事。是歲，築得江樓、花信亭于鎮江公廨。

二年甲申，四十八歲。

二月，自淮東召還，除太常少卿。四月，以太常少卿兼權直學士院。頃之兼權禮部侍郎。

七月，文安公罷樞府奉祠，公亦求去。諭留。九月，除中書舍人，內直如故。時金人再犯淮，羽檄沓至，書詔填委，咨訪酬答，率稱上旨。侍御史晁公武言公草湯思退罷相制無譴責語。公乞祠。不允。閏十一月，兼直學士院。十二月，金人講和，假禮部尚書充賀金生辰使。

乾道元年乙酉，四十九歲。

三月，到燕京館。金遣同僉書宣徽院事高嗣先接伴，禮成而還。五月，除翰林學士、左中奉大夫知制誥，仍兼中書舍人。六月丙戌，除端明殿學士簽書樞密院事。孝宗諭參政錢端禮、虞允文曰：「三省事與洪适商量。」東西府始通班奏事。陳乞高祖父母贈典，爲中書舍人閩安中繳駁。公上章乞寢前命，并乞罷免，不允。八月己丑，除左中大夫、參知政事、兼權知樞密院事。九月甲戌，兼同知樞密院事。十月，充冊立皇太子禮儀使。十二月戊寅，拜左通奉大夫、尚書右僕射、同中書門下平章事、兼樞密使。

二年丙戌，五十歲。

三月，以久雨引咎。三上章乞退。辛未，除觀文殿學士，提舉江州太平興國宮。七月十八日，以觀文殿學士、左通奉大夫知紹興府浙東安撫使。容齋三筆：「文惠公罷相後，起帥浙東。謝表云：『上丞相之印，方事退藏；懷會稽之章，遽叨進用。』謝生日詩詞啓曰：『五十當貴，適買臣治越之年；八千爲秋，辱莊子大椿之譽。』是時正五十也。」公好漢隸。治越之暇，訓釋考證，博極古書，爲隸釋二十七卷。

二年丁亥，五十一歲。

在紹興任。正月八日，序隸釋，刻之。是歲，刻王充論衡于郡齋。

四年戊子，五十二歲。

在紹興任。刻元微之長慶集六十卷于郡齋，爲文序之。二月二十四日序。自署鄱陽郡公。又刻隸續十卷。文敏公爲之序。會稽志：「乾道中上皋耕者得古磚，有文曰『五鳳元年三月造』，以獻府牧洪文惠公。文惠命鑄以爲硯，置案間，意甚愛之。」公再上章請祠。三月，以觀文殿學士提舉臨安府洞霄宮。自是家居者十有六年，始得別墅于城陰，築臺觀，藝花竹。六月，文敏公亦由直學士院除宮觀。四朝聞見錄：「洪遇歸鄱陽，與兄丞相适酬倡觴咏于林壑，甚適。偶得史氏璫花，種之別墅，曰璫野樓，曰璫圃。」

五年己丑，五十三歲。

六年庚寅，五十四歲。

七年辛卯，五十五歲。

詩有「於越歸來三見春」之句。子槐知德安縣。

八年壬辰，五十六歲。

五月，作盤洲記，自稱盤洲老人。直齋書錄解題有盤洲編二卷。洪丞相适兄弟子侄所賦園池詩也。時，連年水旱，流移系道。公恤貧已責，宗族稱之。

九年癸巳，五十七歲。

作楚望樓上梁文。

淳熙元年甲午，五十八歲。

是歲，文安公以資政殿學士提舉洞霄宮。朱彝尊洞霄宮提舉題名記：「淳熙元年，有資政殿學士鄱陽洪适景伯。」今考公提舉洞霄在乾道四年，官觀文殿學士，非資政殿學士也。淳熙初元以資政奉祠洞霄者公之弟遵，字景嚴。朱考之未審爾。十一月，文安公薨。

二年乙未，五十九歲。

三年丙申，六十歲。

作容膝齋上梁文。有云「半百年而日苦無多，又增十稔」。是歲，增改隸釋千有餘字，除去者數板。公次子秘官山陰令刊正之。臘月二十五日落一左齒，有詩。

四年丁酉，六十一歲。

六月，跋岐陽石鼓文。七月二十四，夜夢至一蕭寺，羽人環坐。其一高吟云：「六十方買妾，七十猶生兒。旁人掩口笑，老子知不知。」公應聲答詩一篇云云。是歲病中作遺表。後七年而薨，用之。范至能以敷文閣直學士知成都府，爲刻隸續四卷于蜀。

五年戊戌，六十二歲。

六年己亥，六十三歲。

子榦通判德安府。八月二十一日，萊國夫人沈氏薨，太學博士松正女，母夫人之侄也。追封魏國夫人。是歲，李秀叔名彥穎。以資政殿學士知紹興府，增刻隸續五卷。于越通判喻良能爲跋，稱「觀使大觀文番陽公」，蓋由觀文殿學士進大學士當在己亥以前也。

七年庚子，六十四歲。

八月，有効管璆札子。尤延之名袤。又刻隸續二卷于江東倉臺，輦其板歸之越，公自爲跋。

八年辛丑，六十五歲。

六月，編次淳熙隸釋五十卷成。自題其後云：「右淳熙隸釋目錄五十卷。乾道中書始萌芽，十餘年間拾遺補闕，續卷寢多。鄞江史直翁、苕溪李秀叔一再添刻。南蘭陵尤延之、自秋浦銕板埠助。蘇臺范至能以越本刻于蜀，前後增加，律呂乖次。合而一之，得聖賢岳瀆祠廟四卷、石經一卷、旌孝講德一卷、河渠橋道一卷、阡表壙銘十六卷、雜刻三卷、碑

文器物款識二卷、魏蜀吳晉三卷。譜一卷、圖式八卷、水經一卷、歐趙說六卷、碑鄉一卷。凡碑板二百八十五，磚器二十七。某人垂意古學，見之訢然。命椽史輯舊板，去留移易，首末整整一新。傳之將來，或不束之高閣。勞勤心目，可無憾焉。」此書蓋合隸釋、隸續爲一。屬越帥刊行，爲書史失去，不復存副本。公每以爲恨。十月辛酉，葬萊國夫人鄱陽縣懷德鄉之徐村。公爲墓石，效漢人雙闕，自作小傳，俾後人刻其上。

九年壬寅，六十六歲。

子槐通判興州。

十年癸卯，六十七歲。

十一年甲辰，六十八歲。

二月辛酉，公薨。自罷相後累遇郊祀加恩，爵至鄱陽郡開國公、食邑五千二百戶、實封二千四百戶、贈特進。宰輔編年錄：「二月贈觀文殿大學士、正議大夫致仕洪适爲特進。」累贈太師、魏國公，謚文惠。子九人：槐，字規之，初名格，字成之，朝請大夫，知贛州、江南西路兵馬鈐轄；祕，朝請大夫，知南劍州；櫟，早亡；樅，朝請郎，權發遣長寧軍；樞，朝請郎，軍器主簿；桴，承事郎；楹，朝奉郎，知慶元府定海縣；棟，一作棟。早亡；柂，通直郎，權僉書荆門軍判官廳公事。本傳列九人名，不詳其官秩。孫二十四人。槐子四人：儼，承事郎、龍陽縣丞；備，承事郎，提領建康府戶部贍軍酒庫所幹辦公事；傳，將仕郎；伉。孫三人：芾、

溫、蘊。十二年三月甲申，諸子奉公柩合葬郡西四十里徐村之原。許及之撰公行狀。及
之，公婿也。周必大撰神道碑銘。